

四庫全書

經部

欽定四庫全書

春秋集解卷八

宋 蘇轍 撰

成公

元年春王正月公即位二月辛酉葬我君宣公無冰三月作丘甲夏臧孫許及晉侯盟于赤棘秋王師敗績于茅戎

晉侯使瑕嘉平戎於王劉康公徼戎將伐之叔服曰背盟而欺大國此必敗不聽遂伐之敗績于徐吾氏

書曰王師敗績于茅戎言自敗也桓五年王伐鄭鄭  
人大敗王師射王中肩書伐而不書敗蓋諱之也若  
茅戎之敗非自敗也則亦書王師伐茅戎可也以為  
背盟而欺大國此自敗之道而非人敗之也此所以  
不諱敗也

冬十月

二年春齊侯伐我北鄙夏四月丙戌衛孫良夫帥師及  
齊師戰于新築衛師敗績六月癸酉季孫行父臧孫許

叔孫僑如公孫嬰齊帥師會晉卻克衛孫良夫曹公子  
首及齊侯戰于鞏齊師敗績

齊侯侵虐魯衛故魯衛乞師于晉以伐之魯四子皆  
卿故書諸侯用兵亦有卿皆行者不書略外也

秋七月齊侯使國佐如師已酉及國佐盟于袁婁

召陵之盟制在屈完故不稱使而書曰來盟于師盟  
于召陵袁婁之盟受命於君而可否在晉故書曰齊  
侯使國佐如師已酉及國佐盟于袁婁時師及齊國

都退而與之盟也

八月壬午宋公鮑卒庚寅衛侯速卒取汶陽田冬楚師  
鄭師侵衛十有一月公會楚公子嬰齊于蜀丙申公及  
楚人秦人宋人陳人衛人鄭人齊人曹人邾人薛人鄆  
人盟于蜀

宣公季年求好于楚莊王二君卒而不果成公即位  
而受盟于晉又有鞏之師故楚公子嬰齊救齊悉師  
以行彭名御戎蔡景公為左許靈公為右侵衛及魯

楚自城濮之敗不競於晉莊王雖入陳圍鄭及宋而未嘗合諸侯及蜀之盟諸侯從之者十有一國晉不敢爭自是與晉力爭諸侯其大夫列於聘會與齊晉齒春秋之法公不會大夫今公會嬰齊而不為公諱以為楚師之強不從則國病為國故許之也然其盟十一國也諸侯實畏晉而竊與之盟故嬰齊與秦右大夫說宋華元陳公孫寧衛孫良夫鄭公子去疾齊大夫皆稱人蓋諸侯背晉而竊與楚盟是以略之也

其後四十二年晉趙武楚屈建合諸侯于宋然後晉  
楚之從得交相見又八年楚靈王求諸侯于晉晉人  
許之然後諸侯公得與楚盟耳蔡侯許男不列於會  
乘楚車也齊後於鄭非卿也

三年春王正月公會晉侯宋公衛侯曹伯伐鄭辛亥葬  
衛穆公二月公至自伐鄭申子新宮災三日哭乙亥葬  
宋文公夏公如晉鄭公子去疾帥師伐許公至自晉秋  
叔孫僑如帥師圍棘大雩晉郤克衛孫良夫伐廆咎如

冬十有一月晉侯使荀庚來聘衛侯使孫良夫來聘丙午及荀庚盟丁未及孫良夫盟鄭伐許

許恃楚而不事鄭鄭一歲再伐之書曰鄭伐許狄之也罪未至此或者書鄭人伐許而闕文耳

四年春宋公使華元來聘三月壬申鄭伯堅卒杞伯來朝夏四月甲寅臧孫許卒公如晉葬鄭襄公秋公至自晉冬城鄆鄭伯伐許

五年春王正月杞叔姬來歸仲孫蔑如宋夏叔孫僑如



會晉荀首于穀梁山崩秋大水冬十有一月己酉天王崩十有二月己丑公會晉侯齊侯宋公衛侯鄭伯曹伯邾子杞伯同盟于蟲牢

六年春王正月公至自會二月辛巳立武宮取鄆衛孫良夫帥師侵宋夏六月邾子來朝公孫嬰齊如晉壬申鄭伯費卒秋仲孫蔑叔孫僑如帥師侵宋楚公子嬰齊帥師伐鄭冬季孫行父如晉晉欒書帥師救鄭

七年春王正月魑鼠食郊牛角改卜牛魑鼠又食其角

乃免牛吳伐郟

吳太伯之後其爵曰子其稱吳夷之也以其不通中國而用夷禮故也

夏五月曹伯來朝不郊猶三望秋楚公子嬰齊帥師伐鄭公會晉侯齊侯宋公衛侯曹伯莒子邾子杞伯救鄭八月戊辰同盟于馬陵公至自會吳入州來冬大雩衛孫林父出奔晉

八年春晉侯使韓穿來言汶陽之田歸之于齊

汶陽之田本魯之侵地鞏之戰晉人使齊人歸之今以齊之服事晉也而使魯歸之非義也

晉欒書帥師侵蔡公孫嬰齊如莒宋公使華元來聘夏宋公使公孫壽來納幣

昏禮不稱主人此其稱使何也無以主昏詞窮也納幣不書此何以書公孫壽卿也春秋於伯姬之嫁書之最詳納幣致女以卿媵以非禮公羊穀梁不達也皆以為錄伯姬失之矣

晉殺其大夫趙同趙括

趙嬰通于趙莊姬趙同趙括放之于齊莊姬譖之同括將為亂晉侯殺之稱國以殺殺無罪也

秋七月天子使召伯來賜公命冬十月癸卯杞叔姬卒晉侯使士燮來聘叔孫僑如會晉士燮齊人邾人伐邾衛人來媵

九年春王正月杞伯來逆叔姬之喪以歸公會晉侯齊侯宋公衛侯鄭伯曹伯莒子杞伯同盟于蒲公至自會

二月伯姬歸于宋夏季孫行父如宋致女晉人來媵秋  
七月丙子齊侯無野卒晉人執鄭伯

鄭伯既受盟於蒲楚人以重賂誘之復會楚公子成  
於鄧故晉人執之鄭伯背盟而貳於楚稱人以執不  
得為伯討者晉方不信於諸侯有以致之也

晉欒書帥師伐鄭冬十有一月葬齊頃公楚公子嬰齊  
帥師伐莒庚申莒潰楚人入鄆秦人白狄伐晉鄭人圍  
許

晉人執鄭伯鄭公孫申曰我出師以圍許為將改立君者而舒晉使晉必歸君鄭人從之

城中城

十年春衛侯之弟黑背帥師侵鄭夏四月五卜郊不從乃不郊五月公會晉侯齊侯宋公衛侯曹伯伐鄭

鄭人立世子髡頑樂書曰鄭人立君我執一人何益不如伐鄭歸其君以求成焉於是晉侯有疾立世子州蒲為君以會父在而稱晉侯失父子之道矣

齊人來媵丙午晉侯孺卒秋七月公如晉

公親弔晉喪非禮也晉人止公使送葬諸侯莫在魯人恥之故不書其葬諱之也

冬十月

十有一年春王三月公至自晉晉侯使卻犇來聘己丑及卻犇盟夏季孫行父如晉秋叔孫僑如如齊冬十月十有二年春周公出奔晉

周公楚惡襄惠之偏且與伯輿爭政不勝而出王使

劉子復之盟于鄆而入三日復出凡自周無出周公  
自出故書曰周公出奔晉

夏公會晉侯衛侯于瑣澤秋晉人敗狄于交剛冬十月  
十有三年春晉侯使卻錡來乞師

晉盟主也其用諸侯之師多矣未嘗乞師也今以列  
國之禮乞師善之也

三月公如京師夏五月公自京師遂會晉侯齊侯宋公  
衛侯鄭伯曹伯邾人滕人伐秦



公將與諸侯伐秦不敢過京師則朝焉非以朝行也不書公朝於京師而書公如京師若以朝行然何也方其未朝也未嘗有事是以置其情而書其迹內詞也且明君臣之禮也

曹伯廬卒于師秋七月公至自伐秦冬葬曹宣公

十有四年春王正月莒子朱卒夏衛孫林父自晉歸于衛

晉侯使卻犇送孫林父于衛衛人復之故書曰自晉

歸于衛

秋叔孫僑如如齊逆女鄭公子喜帥師伐許九月僑如以夫人婦姜氏至自齊冬十月庚寅衛侯臧卒秦伯卒十有五年春王二月葬衛定公三月乙巳仲嬰齊卒癸丑公會晉侯衛侯鄭伯曹伯宋世子成齊國佐邾人同盟于戚晉侯執曹伯歸于京師

十三年曹伯盧卒于師曹人使公子負芻守使公子欣時逆曹伯之喪負芻殺其世子而自立故晉侯會

于戚以討之稱侯以執執有罪也歸之于京師禮也  
春秋之書執諸侯者多矣惟是為得禮於是諸侯將  
見欣時於王而立之欣時曰前志有之聖達節次守  
節下失節為君非吾節也雖不能聖敢失守乎遂逝  
奔宋故曹伯雖失國而不名曹無君故也

公至自會夏六月宋公固卒楚子伐鄭秋八月庚辰葬  
宋共公宋華元出奔晉宋華元自晉歸于宋宋殺其大  
夫山宋魚石出奔楚

宋華元為右師魚石為左師蕩澤為司馬華喜為司徒公孫師為司城向為人為大司寇鱗朱為少司寇向帶為大宰魚府為少宰蕩澤弱公室殺公子肥華元不能討乃出奔晉二華戴族也司城莊族也六官皆桓族也魚石將止華元魚府曰右師反必討是無桓氏也魚石曰彼多大勳國人與之不及懼桓氏之無祀於宋也乃止華元于河上請討許之乃反使華喜公孫師帥國人攻蕩氏殺子山魚石向為人鱗朱

向帶魚府出舍於睢上華元止之不可遂奔楚華元之奔晉也未至而復其書曰華元出奔晉且書自晉歸於宋何也元將討山而知力之不能故奔奔而國人許之討故歸故其討山也雖其族人莫敢救之者故書曰宋華元出奔晉宋華元自晉歸于宋言其出入之正是以能討山也使元懷祿顧寵重於出奔則不能討山矣鄭子產為政豐卷將祭請田弗許卷退而徵後子產奔晉子皮止之歸而逐卷亦猶是也山

之不氏背其宗也山實有罪而稱國以殺何也殺一大夫而國幾於亂非外也出者五人而獨稱魚石何也魚石卿也

冬十有一月叔孫僑如會晉士燮齊高無咎宋華元衛孫林父鄭公子鮑邾人會吳于鍾離

吳夷末嘗與中國會晉為之合諸侯而會之特書曰會吳于鍾離言以吳為會也

許遷于葉

十有六年春王正月雨水冰

雨水冰五行木不曲直庶證常寒之罰也劉歆謂上陽施不下通下陰施不上通故雨而木為之冰唐遜皇帝以為木稼者是也木稼蓋木介爾此記異也

夏四月辛未滕子卒鄭公子喜帥師侵宋六月丙寅朔日有食之晉侯使欒黶來乞師甲午晦晉侯及楚子鄭伯戰于鄢陵楚子鄭師敗績楚殺其大夫公子側

鄢陵之敗也楚以一敗殺之故稱國以殺

秋公會晉侯齊侯衛侯宋華元邾人于沙隨不見公

鄆陵之戰公將會之叔孫僑如通於穆姜欲去季孟而取其室公待於壞隤設守而後行故不及於戰沙隨之會僑如使告於晉曰魯侯待於壞隤以待勝者故晉侯不見公桓十年公會衛侯於桃丘弗遇弗遇者不來會也不見公者來而不見也皆曲在外也

公至自會公會尹子晉侯齊國佐邾人伐鄭曹伯歸自

京師



公子欣時既奔宋曹人請復曹伯于晉晉侯謂欣時  
反吾歸而君欣時反曹伯歸欣時置邑與卿而不出  
賢哉欣時之不取為君也曹雖失君而免於爭國之  
亂故書曰曹伯歸自京師言無所與爭者也凡諸侯  
之歸必書曰自某歸於某自某某有奉也歸於某求  
歸也其曰歸自京師者京師無奉而曹伯不求也非  
欣時之賢而能至此乎凡諸侯出而國無君者於歸  
名之曹伯之歸而不名者為欣時故也

九月晉人執季孫行父舍之于茗丘

公之會伐鄭也僑如復使告于晉曰季孫將背晉而  
事齊楚故晉人為之執行父范文子不可乃許魯平  
而赦季孫執內大夫而不於其國故復言其所而志  
之也

冬十月乙亥叔孫僑如出奔齊十有二月乙丑季孫行  
父及晉卻犇盟于扈公至自會乙酉刺公子偃

十有七年春衛北宮括帥師侵鄭夏公會尹子單子晉

侯齊侯宋公衛侯曹伯邾人伐鄭六月乙酉同盟于柯陵

書同盟鄭叛也齊晉之盛天子之大夫會而不盟尊周也柯陵之會尹子單子始與諸侯之盟自是習以為常非禮也

秋公至自會齊高無咎出奔莒

齊慶克通于聲孟子與婦人蒙衣乘輦以入鮑牽見之以告國佐國佐召慶克而謫之夫人怒公反自伐

鄭夫人愬之曰高鮑將不納君而立公子角公不察  
則鮑牽而逐高無咎無咎之子弱以盧叛

九月辛丑用郊晉侯使荀瑩來乞師冬公會單子晉侯  
宋公衛侯曹伯齊人邾人伐鄭十有一月公至自伐鄭  
壬申公孫嬰齊卒于貍脤

嬰齊從於伐鄭還而道卒大夫卒不地其地在外也  
案下十二月丁巳朔則壬申非十一月失之矣

十有二月丁巳朔日有食之邾子貍且卒晉殺其大夫

郤錡郤犇郤至

晉厲公侈反自鄆陵將盡去諸大夫而立其左右三  
郤族大而多怨謀先誅之郤氏知之郤錡欲攻公郤  
至止之皆靖以待命公使長魚矯殺之郤氏雖多怨  
於民而公殺之不以其罪故稱國以殺言刑之過也  
楚人滅舒庸

十有八年春王正月晉殺其大夫胥童

胥童厲公之嬖臣也與厲公謀殺三郤又執欒書中

行偃將殺之公不許公使胥童為卿書偃既執厲公  
乃先殺童童雖道君為亂然書偃自是以弑君故稱  
國以殺

庚申晉弑其君州蒲

欒書中行偃實弑厲公然而厲公凌虐其臣民以及  
於禍故稱國以弑罪在君也

齊殺其大夫國佐

齊以高弱之叛使崔杼慶克圍盧國佐從諸侯圍鄭

以難請而歸遂如廬師殺慶克以穀叛齊侯殺之佐  
雖以專殺叛君為罪然其咎發於慶克齊人右慶氏  
而殺佐故稱國以殺罪累上也

公如晉夏楚子鄭伯伐宋宋魚石復入于彭城

楚子伐宋納魚石向為人鱗朱向帶魚府于彭城而  
封之不曰納魚石將言魚石之復入故也宣十一年  
楚子入陳納公孫寧儀行父于陳則何以不言入寧  
行父則有罪矣楚子討其罪人而納之疑若楚子之

無罪也將正楚子之罪是以言納而不言其入也魚  
石之入不曰自楚何也言伐宋則自楚也不曰叛何  
也將以亂國非止叛也故宋魚石晉欒盈皆不曰叛  
公至自晉晉侯使士匄來聘秋杞伯來朝八月邾子來  
朝築鹿囿己丑公薨于路寢冬楚人鄭人侵宋晉侯使  
士魴來乞師十有二月仲孫蔑會晉侯宋公衛侯邾子  
齊崔杼同盟于虛打丁未葬我君成公



春秋集解卷八

欽定四庫全書

春秋集解卷九

宋 蘇轍 撰

襄公

元年春王正月公即位仲孫蔑會晉欒黶宋華元衛甯殖曹人莒人邾人滕人薛人圍宋彭城

春秋書邑皆不繫其國以為邑不待國別而知也楚既取彭城以封魚石而猶書曰圍宋彭城者諸侯將取而歸之宋故致其意也或曰取宋之邑以封其叛

臣不予楚得之故終繫之宋也

夏晉韓厥帥師伐鄭仲孫蔑會齊崔杼曹人邾人杞人  
次于鄆

諸侯之師會晉伐鄭故次于鄆以待之

秋楚公子壬夫帥師侵宋九月辛酉天王崩邾子來朝  
冬衛侯使公孫剽來聘晉侯使荀瑩來聘

九月王崩十月計未至於諸侯故雖不廢朝聘不為  
非禮

二年春王正月葬簡王鄭師伐宋夏五月庚寅夫人姜氏薨六月庚辰鄭伯踰卒晉師宋師衛甯殖侵鄭

鄭雖以叛中國為罪而伐其喪非禮也

秋七月仲孫蔑會晉荀瑩宋華元衛孫林父曹人邾人于戚己丑葬我小君齊姜叔孫豹如宋冬仲孫蔑會晉荀瑩齊崔杼宋華元衛孫林父曹人邾人滕人薛人小邾人于戚遂城虎牢

虎牢鄭地也鄭久從楚諸侯歲為之興師於是城虎

牢以偏之明年而鄭受盟

楚殺其大夫公子申

申為右司馬多受小國之賂以偏子重子辛罪不至死而楚人殺之故稱國以殺

三年春楚公子嬰齊帥師伐吳公如晉夏四月壬戌公及晉侯盟于長樗

禮諸侯不親盟於他國成二年公如晉晉人使陽處父盟公三年雖改盟而猶盟於其國亦非禮也晉悼

公修禮於諸侯故去其國而與公盟於長樗禮也  
公至自晉六月公會單子晉侯宋公衛侯鄭伯莒子邾  
子齊世子光己未同盟於雞澤陳侯使袁僑如會戊寅  
叔孫豹及諸侯之大夫及陳袁僑盟

陳始亦從楚令尹子辛侵欲於小國故陳成公使袁  
僑求成於晉諸侯既盟而後袁僑至故復使大夫盟  
之殊及袁僑主盟袁僑也穀梁曰諸侯盟又大夫相  
與私盟大夫張也雞澤之會諸侯始失正矣夫諸侯

不專敵袁僑而使大夫盟之禮也且悼公晉之明主  
而以為失正則過矣

秋公至自會冬晉荀瑩帥師伐許

許事楚故也

四年春王三月己酉陳侯午卒夏叔孫豹如晉秋七月  
戊子夫人妣氏薨葬陳成公八月辛亥葬我小君定姒  
冬公如晉陳人圍頓

五年春公至自晉夏鄭伯使公子發來聘叔孫豹卽世

子巫如晉

四年公如晉請屬鄆故叔孫豹覲鄆世子于晉以成屬鄆書曰叔孫豹鄆世子巫如晉比之魯大夫也

仲孫蔑衛孫林父會吳于善道

晉將會吳使魯衛先與吳會且告會期故特書會吳也

秋大雩楚殺其大夫公子壬夫

楚人討陳叛故曰由壬夫實貪欲焉殺之壬夫則有



罪矣廢而勿用可也殺之過矣故稱國以殺

公會晉侯宋公陳侯衛侯鄭伯曹伯莒子邾子滕子薛伯齊世子光吳人鄆人于戚

成十五年會于鍾離是年會于善道十年會于柰十四年會于向皆特書會吳今戚之會會吳且命戍陳其不特書會吳為戍陳也吳之稱人與鄆皆列不可曰吳鄆人也鄆之復列於會魯人不利屬鄆也

公至自會冬戍陳

諸侯皆戍而獨書魯者受命于戚無命告也

楚公子貞帥師伐陳公會晉侯宋公衛侯鄭伯曹伯齊  
世子光救陳十有二月公至自救陳辛未季孫行父卒  
六年春王三月壬午杞伯姑容卒夏宋華弱來奔秋葬  
杞桓公滕子來朝莒人滅鄆冬叔孫豹如邾季孫宿如  
晉十有二月齊侯滅萊

七年春邾子來朝夏四月三卜郊不從乃免牲小邾子  
來朝城費秋季孫宿如衛八月螽冬十月衛侯使孫林

父來聘壬戌及孫林父盟楚公子貞帥師圍陳十有二  
月公會晉侯宋公陳侯衛侯曹伯莒子邾子于鄆鄭伯  
髡頑如會未見諸侯丙戌卒于鄆

鄭伯如會而名何也名其卒也鄭伯將會于鄆子駟  
相鄭伯不禮焉子駟使賊弑之而以瘡疾赴于諸侯  
然春秋從而信之何也君子不逆詐不億不信可欺  
以其方不可罔以非其道也被以是告我我從而書  
之何病焉世之治也內有公卿大夫外有方伯連率

是將有發其姦者然後從而治之何後焉故春秋者  
有待於史而後足非自以為史也世之為春秋而不  
信史則過矣

陳侯逃歸

楚人以陳叛故殺公子壬夫而亟討陳雖諸侯救陳  
而陳人不敢安也書曰逃歸以其背中國罪之也

八年春王正月公如晉夏葬鄭僖公鄭人侵蔡獲蔡公  
子燮

鄭子國子耳為晉侵蔡獲蔡公子燹鄭人皆喜子產  
曰小國無文德而有武功禍也晉楚爭鄭自此始矣  
自是晉楚之兵交至於鄭鄭人疾之書曰鄭人侵蔡  
無故犯楚以為國患罪之也

季孫宿會晉侯鄭伯齊人宋人衛人邾人于邢丘

晉悼公脩文襄之業改命朝聘之數使諸侯之大夫  
聽命故公雖在晉而季孫宿與齊高厚宋向戌衛甯  
殖邾大夫會之鄭伯獻捷於會故親聽命大夫稱人

衆詞也其朝聘之節儉而有禮衆之所安也

公至自晉莒人伐我東鄙秋九月大雩冬楚公子貞帥帥伐鄭晉侯使士匄來聘

九年春宋災夏季孫宿如晉五月辛酉夫人姜氏薨秋八月癸未葬我小君穆姜冬公會晉侯宋公衛侯曹伯莒子邾子滕子薛伯杞伯小邾子齊世子光伐鄭十有二月己亥同盟于戲楚子伐鄭

十年春公會晉侯宋公衛侯曹伯莒子邾子滕子薛伯

杞伯小邾子齊世子公會吳于祖

特書會吳以吳為會故也

夏五月甲午遂滅偃陽

偃陽小國妘姓晉將取之以封宋向戌因會而滅國  
以封宋大夫非義也

公至自會楚公子貞鄭公孫輒帥師伐宋晉師伐秦秋  
莒人伐我東鄙公會晉侯宋公衛侯曹伯莒子邾子齊  
世子光滕子薛伯杞伯小邾子伐鄭

齊世子光先至於師晉人使長於滕明年遂先莒禮  
小國之君當大國之卿齊世子之先子男禮之失也  
冬盜殺鄭公子騂公子發公孫輒戍鄭虎牢

伐鄭之諸侯皆戍虎牢而獨書魯者受命於魯不復  
告也二年城虎牢不繫於鄭邑不待國別而知也諸  
侯既城虎牢非鄭地矣而繫之鄭諸侯將服鄭而歸  
之故致其意也鄭之虎牢宋之彭城一也

楚公子貞帥師救鄭公至自伐鄭



十有一年春王正月作三軍夏四月四卜郊不從乃不郊鄭公孫舍之帥師侵宋

晉人再以諸侯伐鄭楚輒救之鄭人患之謀曰楚弱於晉晉不吾疾也晉疾楚將辟之何為而使晉師致死於我楚弗敢敵而後可固與也公孫舍之曰與宋為惡諸侯必至我從之盟楚師至吾又從之則晉怒甚矣晉能驟來楚將不能吾乃固與晉大夫說之於是侵宋以致晉師

公會晉侯宋公衛侯曹伯齊世子光莒子邾子滕子薛伯杞伯小邾子伐鄭秋七月己未同盟于亳城北公至自伐鄭楚子鄭伯伐宋

晉師歸楚子伐鄭鄭伯逆之遂伐宋從公孫舍之之謀也

公會晉侯宋公衛侯曹伯齊世子光莒子邾子滕子薛伯杞伯小邾子伐鄭會於蕭魚

鄭與會也八年鄭人侵蔡獲蔡公子燮自是晉楚爭

鄭五年之間晉人四以諸侯伐鄭楚輒救之晉用知  
瑩之謀未嘗與楚人戰至是楚不能應遂全師以服  
鄭於是鄭固與晉二十餘年楚不能爭雖城濮之克  
不能過也

公至自會楚人執鄭行人良霄

鄭使良霄告絕于楚楚人執之書曰楚人執鄭行人  
言非其罪也

冬秦人伐晉

十有二年春王三月莒人伐我東鄙圍台季孫宿帥師  
救台遂入郕夏晉侯使士魴來聘秋九月吳子乘卒冬  
楚公子貞帥師侵宋公如晉

十有三年春公至自晉夏取郛秋九月庚辰楚子審卒  
冬城防

十有四年春王正月季孫宿叔老會晉士匄齊人宋人  
衛人鄭公孫蠆曹人莒人邾人滕人薛人杞人小邾人  
會吳于向

十三年楚人大敗吳師吳告敗于晉晉人爲之合諸侯以謀楚故特書曰會吳于向季孫宿叔老皆卿也卿爲卿介非禮也齊崔杼宋華閱衛北宮括稱人情也

二月乙未朔日有食之夏四月叔孫豹會晉荀偃齊人宋人衛北宮括鄭公孫蠆曹人莒人邾人滕人薛人杞人小邾人伐秦己未衛侯出奔齊

衛侯多行無禮於其國孫林父與甯殖出之而立公

孫剽此出而國有君者也其曰衛侯而不名者何也  
魯使厚成叔弔于衛厚孫歸語臧武仲曰衛君其必  
歸乎有大叔儀以守有母弟鱄以出或撫其內或營  
其外能無歸乎又使臧孫咺衛侯衛侯與之言虐退  
而告人曰衛侯不得入矣子展子鮮聞之見臧孫與  
之言道臧孫曰衛侯其必入二子者或輓之或推之  
欲無入得乎故於其出奔及其入于夷儀也皆書衛  
侯而不名言其有歸道也及其歸而後書曰衛侯衎

復歸于衛此所謂出而國無君者於歸名之也衛雖有君而衍有歸道焉猶無君也

莒人侵我東鄙秋楚公子貞帥師伐吳冬季孫宿會晉士匄宋華閱衛孫林父鄭公孫蠆莒人邾人于戚

十有五年春宋公使向戌來聘二月己亥及向戌盟于劉劉夏逆王后于齊

外逆女不書過我不書天子之大夫不名書劉夏非大夫也夏從單靖公以逆而獨書夏過我也

夏齊侯伐我北鄙圍成公救成至遇季孫宿叔孫豹帥師城成郛

備齊也城雖不時非譏也

秋八月丁巳日有食之邾人伐我南鄙冬十有一月癸亥晉侯周卒

十有六年春王正月葬晉悼公三月公會晉侯宋公衛侯鄭伯曹伯莒子邾子薛伯杞伯小邾子于溴梁戊寅大夫盟



衛侯剽也二十五年衛侯入于夷儀衎也二君皆稱  
衛侯猶鄭突及儀皆稱鄭伯也晉平公即位而為溴  
梁之會以諸侯燕于溫使諸大夫舞曰歌詩必類齊  
高厚之詩不類荀偃怒曰諸侯有異志矣使諸大夫  
盟高厚高厚逃歸於是叔孫豹晉荀偃宋向戌衛甯  
殖鄭公孫蠆曹莒邾薛杞小邾之大夫盟夫壯丘之  
會諸侯既次于匡書曰公孫敖帥師及諸侯之大夫  
救徐雞澤之會諸侯既盟而陳侯使袁僑如會書曰

叔孫豹及諸侯之大夫及陳袁僑盟今諸侯既會將  
使大夫盟高厚高厚迺歸則書曰叔孫豹及諸侯之  
大夫盟可也獨書曰大夫盟何也諸侯既會而燕使  
諸大夫舞既非禮矣又曰歌詩必類求之無已而高  
厚不從過在晉也苟偃怒而使大夫盟高厚欲以強  
服諸侯則政在大夫也政在大夫以義服人猶可強  
則亂矣自是晉政在六卿故獨書大夫盟言無君也  
晉人執呂子邾子以歸齊侯伐我北鄙夏公至自會五

月甲子地震叔老會鄭伯晉荀偃衛甯殖宋人伐許秋  
齊侯伐我北鄙圍郕大雩冬叔孫豹如晉

十有七年春王二月庚午邾子貜卒

十六年晉人執莒子邾子今書邾子貜卒則既釋之  
矣不書其歸不告也

宋人伐陳夏衛石買帥師伐曹秋齊侯伐我北鄙圍桃  
高厚帥師伐我北鄙圍防

不稱齊高厚見其亟伐也

九月大雩宋華臣出奔陳

華臣弱臯比之室使賊殺其宰華吳宋公怒將逐之  
故懼而出奔

冬邾人伐我南鄙

十有八年春白狄來夏晉人執衛行人石買

十七年石買侵曹取重丘曹人訴之晉晉人因其使  
而執之買則有罪而執之於其使則非禮也故書曰  
執衛行人石買

秋齊師伐我北鄙冬十月公會晉侯宋公衛侯鄭伯曹伯莒子邾子滕子薛伯杞伯小邾子同圍齊曹伯負芻卒于師楚公子午帥師伐鄭

十有九年春王正月諸侯盟于祝柯晉人執邾子公至自伐齊取邾田自漵水

成元年晉人敗齊于鞏使齊人歸我汶陽之田書曰取汶陽田不言齊魯地也本以晉命取田于邾故書曰取邾田自漵水言非魯地也

季孫宿如晉葬曹成公夏衛孫林父帥師伐齊秋七月辛卯齊侯環卒晉士匄帥師侵齊至穀聞齊侯卒乃還八月丙辰仲孫蔑卒齊殺其大夫高厚

齊侯出其世子光而立其少子牙使高厚傅之齊侯疾病崔杼逆光而立之光殺牙杼殺高厚而并其室故稱國以殺罪累上也

鄭殺其大夫公子嘉冬葬齊靈公城西郭叔孫豹會晉士匄于柯城武城

二十年春王正月辛亥仲孫速會莒人盟于向夏六月  
庚申公會晉侯齊侯宋公衛侯鄭伯曹伯莒子邾子滕  
子薛伯杞伯小邾子盟于澶淵秋公至自會仲孫速帥  
師伐邾蔡殺其大夫公子燮

蔡文侯欲事晉畏楚不能行而卒楚人使蔡無常公  
子燮求從先君以利蔡蔡人殺之稱國以殺非其罪  
也

蔡公子履出奔楚陳侯之弟黃出奔楚

陳慶虎慶寅畏公子黃之偪愬諸楚曰與蔡司馬同謀楚人以為討黃出愬于楚書曰陳侯之弟罪陳侯也

叔老如齊冬十月丙辰朔日有食之季孫宿如宋

二十有一年春王正月公如晉邾庶其以漆閭丘來奔庶其邾大夫也邾莒之大夫不書微也特書庶其重地也以地叛雖賤必書地以名其人終為不義弗可滅矣或求名而不得或欲蓋而名章齊豹為衛司寇



作而不義其書為盜邾庶其莒牟夷邾黑肱以土地  
出求食而已不求其名賤而必書此二物者所以懲  
肆而去貪也若艱難其身以險危大人而有名章徹  
攻難之士將奔走之若竊邑叛君以徼大利而無名  
貪冒之人將寘力焉故春秋書齊豹曰盜三叛人名  
所以懲不義惡無禮也左氏之說云爾子因其說而  
申之曰春秋之法小國之大夫不書然紀裂繻來逆  
女則書以其接我也接我以禮而書貴之也小國之

大夫來奔者亦衆矣雖接我而不書法也惟以地來奔則書惡其接我以利也然魯人非大夫而以地出奔者猶不書何也以利接我雖微必書詳內也以利接外以微故不書略外也略外而詳內此聖人處己之厚也

夏公至自晉秋晉欒盈出奔楚九月庚戌朔日有食之冬十月庚辰朔日有食之曹伯來朝公會晉侯齊侯宋公衛侯鄭伯曹伯莒子邾子于商任

錮樂氏非禮也古者大夫去國君使人道之出疆又先於其所往

二十有二年春王正月公至自會夏四月秋七月辛酉叔老卒冬公會晉侯齊侯宋公衛侯鄭伯曹伯莒子邾子薛伯杞伯小邾子于沙隨公至自會楚殺其大夫公子追舒

追舒為令尹而寵觀起未益祿而有馬數十乘楚人患之故誅追舒罪不至死故稱國以殺

二十有三年春王二月癸酉朔日有食之三月己巳杞伯句卒夏邾畀我來奔葬杞孝公陳殺其大夫慶虎及慶寅陳侯之弟黃自楚歸于陳

陳侯如楚公子黃愬二慶于楚楚人召之二慶以陳叛楚屈建從陳侯圍陳陳殺二慶而納黃二慶之罪當死而陳不能誅也因楚而後克之故稱國以殺所以病陳也二慶死則黃之歸無難矣

晉欒盈復入于晉入于曲沃

欒盈在齊晉將嫁女于吳齊侯使析歸父媵之以藩  
載欒盈納諸曲沃盈帥曲沃之甲以入晉不勝反入  
曲沃書曰復入晉人之怨欒氏者衆難於復入也不  
書自齊何也齊之納盈非以兵明納之也譬如盜賊  
私納之耳故不書自齊

秋齊侯伐衛遂伐晉八月叔孫豹帥師救晉次于雍榆  
己卯仲孫速卒冬十月乙亥臧孫紇出奔邾晉人殺欒  
盈齊侯襲莒

二十有四年春叔孫豹如晉仲孫羯帥師侵齊夏楚子  
伐吳秋七月甲子朔日有食之既齊崔杼帥師伐莒大  
水八月癸巳朔日有食之公會晉侯宋公衛侯鄭伯曹  
伯莒子邾子滕子薛伯杞伯小邾子于夷儀冬楚子蔡  
侯陳侯許男伐鄭公至自會陳鍼宜咎出奔楚叔孫豹  
如京師大饑

二十有五年春齊崔杼帥師伐我北鄙夏五月乙亥齊  
崔杼弑其君光

齊侯背晉與楚且亂崔杼之室雖無道而崔杼立光殺光無君之心不可忍也故稱崔杼

公會晉侯宋公衛侯鄭伯曹伯莒子邾子滕子薛伯杞伯小邾子于夷儀六月壬子鄭公孫舍之帥師入陳秋八月己巳諸侯同盟于重丘公至自會衛侯入于夷儀楚屈建帥師滅舒鳩冬鄭公孫夏帥師伐陳十有二月吳子遏伐楚門于巢卒

吳子伐楚而名何也名其卒也吳子伐楚而門于巢

巢牛臣射而殺之不言滅何也死而非獲也死而非獲則卒也

二十有六年春王二月辛卯衛甯喜弑其君剽

衛侯衎入于夷儀使衛甯喜求復故喜弑剽而納衎不言衎之弑而言喜之弑何也喜弑而後衎得入則弑君之罪喜專之也

衛孫林父入于戚以叛

林父始與甯殖出行而立剽甯喜納衎故林父以戚



如晉書曰叛非以亂國將以自封也

甲午衛侯衎復歸于衛夏晉侯使荀吳來聘公會晉人鄭良霄宋人曹人于澶淵秋宋公殺其世子痤晉人執衛甯喜八月壬午許男甯卒于楚冬楚子蔡侯陳侯伐鄭葬許靈公

二十有七年春齊侯使慶封來聘夏叔孫豹會晉趙武楚屈建蔡公孫歸生衛石惡陳孔奐鄭良霄許人曹人于宋

宋向戌善於晉趙武又善於楚屈建故會晉楚而求  
弭諸侯之兵既會楚人束甲將盟又爭先晉人從而  
先之不較也然春秋書之卒先晉而後楚何也晉固  
主諸侯矣楚雖以力加之而晉之所以先諸侯者猶  
在也春秋豈以一時之先而易其所常先哉是以卒  
先晉言先後之不可以力爭也郎之戰鄭實主兵而  
先齊衛亦猶是也

衛殺其大夫甯喜

衛侯既入而患甯喜之專也殺之喜雖弑君而於衛侯為有功衛侯殺之則為不義故稱國以殺

衛侯之弟鱣出奔晉

衛侯之入也使鱣與甯喜要言焉既殺甯喜鱣病其失言也故出書曰衛侯之弟罪衛侯也

秋七月辛巳豹及諸侯之大夫盟于宋冬十有二月乙亥朔日有食之

二十有八年春無冰夏衛石惡出奔晉邾子來朝秋八

月大雩仲孫羯如晉冬齊慶封來奔十有一月公如楚  
十有二月甲寅天王崩乙未楚子昭卒

二十有九年春王正月公在楚夏五月公至自楚庚午  
衛侯衎卒閹弑吳子餘祭仲孫羯會晉荀盈齊高止宋  
華定衛世叔儀鄭公孫段曹人莒人滕人薛人小邾人  
城杞晉侯使士鞅來聘杞子來盟吳子使札來聘

吳自成七年伐郟而書之曰吳終於春秋無加焉唯  
其卒則稱吳子戚之會則稱吳人柏舉之戰黃池之

會亦稱吳子其卒也不可以不稱子而戚以鄆柏舉以蔡侯黃池以晉侯皆非進之也今其來聘也書子書名進之也以札之賢而修禮於中國不可不進也然終春秋曰吳蓋猶以夷終也

秋九月葬衛獻公齊高止出奔北燕冬仲孫羯如晉三十年春王正月楚子使薳罷來聘夏四月蔡世子般弑其君固

蔡侯為般娶于楚而通焉故及於弑君雖無道而罪

不及民故稱臣以弑

五月甲午宋災宋伯姬卒

外災不日略之也宋災何以書日日伯姬之卒也伯姬待姆而卒於火是以日其災也然則春秋賢伯姬乎君子謂伯姬女而不婦女待人婦義事也

天王殺其弟佞夫王子瑕奔晉

靈王崩詹括欲立王子佞夫佞夫弗知尹言多劉穀單蔑耳過鞏成殺佞夫括及瑕廖奔晉佞夫無罪五


臣以王故殺之而王弗察猶王殺之也故書曰天王殺其弟佞夫王子瑕奔晉括廖不書賤也

秋七月叔弓如宋葬宋共姬鄭良霄出奔許自許入于鄭鄭人殺良霄冬十月葬蔡景公晉人齊人宋人衛人鄭人曹人莒人邾人滕人薛人杞人小邾人會于澶淵  
宋災故

三十有一年春王正月夏六月辛巳公薨于楚宮秋九月癸巳子野卒己亥仲孫羯卒冬十月滕子來會葬癸

酉葬我君襄公十有一月莒人弑其君密州

莒子生去疾及展輿既立展輿又廢之莒子虐國人  
患之展輿因國人攻而弑之非獨其子也





春秋集解卷九

欽定四庫全書

經部  
春秋集解卷十二

詳校官給事中臣戴璐

給事中臣溫常綬覆勘

總校官進士臣繆琪

校對官學正臣湯垣

謄錄舉人臣李逢泰

欽定四庫全書

春秋集解卷十

宋 蘇轍 撰

昭公

元年春王正月公即位叔孫豹會晉趙武楚公子圍齊  
國弱宋向戌衛齊惡陳公子招蔡公孫歸生鄭罕虎許  
人曹人于虢

晉楚尋宋之盟楚公子圍請讀舊書加書于牲上而  
不歆血故不書盟

三月取鄆夏秦伯之弟鍼出奔晉六月丁巳邾子華卒  
晉荀吳帥師敗狄于大鹵秋莒去疾自齊入于莒莒展  
與出奔吳

去疾齊出也展與吳出也密州之弑也去疾奔齊展  
與立而奪羣公子秩羣公子召去疾齊人納之去疾  
之不稱公子將為君也書曰入于莒展與在也展與  
雖逾年而不稱莒子不能君也

叔弓帥師疆鄆田葬邾悼公冬十有一月己酉楚子麇

卒楚公子比出奔晉

二年春晉侯使韓起來聘夏叔弓如晉秋鄭殺其大夫

公孫黑

駟黑富而無禮襄三十年攻良霄而殺之元年與游  
楚爭室而逐之鄭人畏其彊不討也既又將作亂而  
去游氏疾作而不克子產因其疾也數其罪而殺之  
黑固有罪而鄭之所以誅之者亦殆矣是以稱國以  
殺也

冬公如晉至河乃復季孫宿如晉

三年春王正月丁未滕子原卒夏叔弓如滕五月葬滕  
成公秋小邾子來朝八月大雩冬大雨雹北燕伯款出  
奔齊

四年春王正月大雨雹夏楚子蔡侯陳侯鄭伯許男徐  
子滕子頓子胡子沈子小邾子宋世子佐淮夷會于申  
晉自平公始衰齊靈公莊公背之平公屢合諸侯以  
討焉襄二十五年齊莊公死齊與晉平晉侯自是不

復出與會盟其大夫趙武為政諸侯少安然而晉曰  
益衰政在六卿故楚靈王合諸侯于申而晉不敢爭  
楚自是益肆於中國

楚人執徐子秋七月楚子蔡侯陳侯許男頓子胡子沈  
子淮夷伐吳執齊慶封殺之

齊慶封與於崔杼之亂及敗自魯奔吳吳封之朱方  
楚子以力從諸侯而伐吳罪也而其誅慶封義也故  
慶封雖在吳而謂之齊慶封言當其罪也凡執大夫

稱人此其序諸侯以執之何也序諸侯以伐吳不可復稱人也

遂滅賴九月取鄫冬十有二月乙卯叔孫豹卒

五年春王正月舍中軍

襄十一年作中軍三分公室而各有其一季氏盡征之叔孫氏臣其子弟孟氏取其半及其舍之四分公室季氏擇二二子各一皆盡征之而貢于公

楚殺其大夫屈申



楚子以屈申為貳於吳而殺之稱國以殺言無罪也  
公如晉夏莒牟夷以牟婁及防茲來奔秋七月公至自  
晉戊辰叔弓帥師敗莒師于蚡泉秦伯卒冬楚子蔡侯  
陳侯許男頓子沈子徐人越人伐吳

越於是始見徐吳越雖與中國會盟皆以夷故不得  
稱人今越始見而與徐皆稱人何也不可云沈子徐  
越伐吳故也猶戚之會吳以鄫故稱人耳

六年春王正月杞伯益姑卒葬秦景公夏季孫宿如晉

葬杞文公宋華合比出奔衛秋九月大雩楚遂罷帥師  
伐吳冬叔弓如楚齊侯伐北燕

七年春王正月暨齊平

齊侯伐北燕將納燕伯款晏子曰不入燕有君矣民  
不貳吾君賄左右諂作大事不以信未嘗可也燕  
人歸燕姬賂以瑤瓊玉櫝竿耳乃不克納二月庚午  
盟于濡上書平而不書其盟何也燕求於齊曰暨燕  
平齊求於燕曰暨齊平齊將以正燕而納女及賂反

求成焉書曰暨齊平所以病齊也不言其盟盟不足信也穀梁曰以內及外曰暨凡言平始不平也齊魯未嘗不平而何為平乎

三月公如楚叔孫婼如齊涖盟夏四月甲辰朔日有食之秋八月戊辰衛侯惡卒九月公至自楚冬十有一月癸未季孫宿卒十有二月癸亥葬衛襄公

八年春陳侯之弟招殺陳世子偃師夏四月辛丑陳侯溺卒

陳哀公元妃鄭姬生世子偃師二妃生公子留下妃  
生公子勝二妃嬖留有寵屬之司徒招與公子過哀  
公有廢疾招過殺偃師而立留公縊而卒書招而不  
書過招首事也稱陳侯之弟以親親責之也

叔弓如晉楚人執陳行人干徵師殺之

徵師以哀公之喪赴于楚且告有立君公子勝愬于  
楚楚人殺之稱行人言非其罪也

陳公子留出奔鄭

楚將討陳故留出奔留既為君矣不曰陳留而曰陳公子留何也留立於招耳為君非留志也

秋蒐于紅陳人殺其大夫公子過大雩冬十月壬午楚師滅陳

楚靈王凌虐小國使公子棄疾帥師滅陳十一月滅蔡自以為功也故春秋書之皆曰楚師而不書其人所謂求名而不得者也或曰楚子虔誘蔡侯般殺之則稱楚子何也曰誘而殺之此盜賊之事而非所以

為功也書楚子賤也

執陳公子招放之于越殺陳孔奐

招之稱公子其兄亡矣孔奐招之黨也楚人宥招而殺奐刑之辟也

葬陳哀公

九年春叔弓會楚子于陳許遷于夷

許人畏鄭求救于楚楚使公子棄疾遷之書曰許遷于夷自遷也

夏四月陳災

陳已滅為楚縣而猶書陳災何也楚雖滅陳五年而陳復天未絕陳陳未亡故也公羊穀梁曰陳滅而書陳存陳也春秋非能存陳陳則未亡耳

秋仲孫獲如齊冬築郎囿

十年春王正月夏齊樂施來奔

齊樂施高彊皆嗜酒而惡陳氏鮑氏陳鮑及其醉而攻之不勝遂來奔高彊不書非卿也

秋七月季孫意如叔弓仲孫矍帥師伐莒戊子晉侯彪卒九月叔孫婁如晉葬晉平公十有二月甲子宋公成卒

十有一年春王二月叔弓如宋葬宋平公夏四月丁巳楚子虔誘蔡侯般殺之于申

般有弑君之罪而諸侯不能討十三年楚子將滅蔡而以好召蔡侯殺之因以滅蔡非討其罪也故名楚子而書其誘所以深罪楚子也若蔡侯之罪則見於



其弑矣

楚公子棄疾帥師圍蔡五月甲申夫人歸氏薨大蒐于  
比蒲仲孫矍會邾子盟于祲祥秋季孫意如會晉韓起  
齊國弱宋華亥衛北宮佗鄭罕虎曹人杞人于厥慙九  
月己亥葬我小君齊歸冬十有一月丁酉楚師滅蔡執  
蔡世子有以歸用之

楚子滅蔡用蔡世子有于岡山不稱楚子惡其求名  
也蔡侯死蔡世子既立矣其不稱蔡子而稱蔡世子

何也蔡侯死於楚不獲歸于蔡不斂不葬其子雖立不成君也是以稱世子而已君沒既葬稱子未葬稱子某喪未至而稱世子固其宜也

十有二年春齊高偃帥師納北燕伯于陽

三年燕伯奔齊六年齊將納之而不克至是始納之其言納燕有君也名其出奔而不名其納不以高偃名燕伯君臣之禮也不言納之者燕未得所都也

三月壬申鄭伯嘉卒夏宋公使華定來聘公如晉至河

乃復五月葬鄭簡公楚殺其大夫成熊秋七月冬十月  
公子慙出奔齊

季氏之臣南蒯怨季孫之不禮也將去季孫而立公  
子慙不克南蒯以費叛慙從公於晉還及郊聞亂遂  
奔齊

楚子伐徐晉伐鮮虞

晉荀吳偽會齊師假道於鮮虞以滅肥遂伐鮮虞晉  
雖以詐為罪而書曰晉伐鮮虞以夷狄書之過矣晉

獻公假道於虞以滅虢因以執虞公其滅虢也書晉師其執虞公也書晉人今伐鮮虞稱人若師可也特書晉深罪之也楚滅陳蔡而晉不救力誠不能君子不罪也能伐鮮虞而不救陳蔡力非不足也棄諸侯也故以夷書之

十有三年春叔弓帥師圍費夏四月楚公子比自晉歸于楚弑其君虔于乾谿

楚子之立也其弟比奔晉黑肱奔鄭及滅蔡以棄疾

為蔡公有觀從者事蔡朝吳曰今不封蔡蔡不封矣  
以棄疾之命召比與黑肱既至蔡人奉棄疾帥陳蔡  
不羹許葉之師以入楚楚子伐徐師于乾谿衆潰而  
歸遂自殺也於是比為王黑肱為令尹棄疾為司馬  
比將為君不曰楚比而曰公子比何也比之歸非其  
謀也亂始於觀從而成於棄疾以比為名而已為君  
非比志也比不志於為君迫於觀從棄疾則其書曰  
楚公子比弑其君虔何也比雖不志於君迫於觀從

棄疾而以身許之以致虔死則比雖為不弑而弑君之名比尸之矣比之歸也虔猶在楚其不曰入何也觀從召之蔡人與之楚人不拒則比之歸無難也

楚公子棄疾殺公子比

比弑其君殺之不稱楚人而曰公子棄疾殺公子比何也棄疾非討其弑而代之也比既為君矣不曰楚公子棄疾弑其君比何也衆雖以比為君而比不當君也棄疾將以為君不曰楚棄疾而曰公子棄疾何

也以親責之猶齊商人也

秋公會劉子晉侯齊侯宋公衛侯鄭伯曹伯莒子邾子  
滕子薛伯杞伯小邾子于平丘八月甲戌同盟于平丘  
公不與盟

八年晉成虎祁之宮諸侯朝而歸者皆有貳心十二  
年齊侯往朝于晉晉侯以齊侯燕投壺齊侯曰寡人  
中此與君代興晉人亦知其將貳也且為伐莒取鄆  
故將以諸侯來討故會于平丘齊人不欲盟要之乃

可故書同盟有不同者故也桃丘之會書曰弗遇沙隨之會書曰不見公可遇而彼弗吾遇可見而彼不吾見皆曲在彼也今魯以侵虐小國為罪諸侯有盟而不得與故書曰公不與盟言罪在我不在彼也

晉人執季孫意如以歸公至自會蔡侯廬歸于蔡陳侯吳歸于陳

楚棄疾即位復封陳蔡蔡世子有之子廬陳世子偃師之子吳皆受封於楚而歸不曰蔡廬陳吳而曰蔡



侯廬陳侯吳既侯於楚也陳蔡既滅天子不能存諸侯不能救而楚復之春秋從而君之則許楚之專封歟曰非也春秋書陳蔡之自復而不書楚之復封陳蔡以為楚虔雖以強滅之而天下不與虔既死則其勢當自復故書廬吳之歸如國未始滅者使廬吳未侯於楚則將書之曰蔡廬陳侯吳而已以其既侯於楚也故書曰蔡侯廬陳侯吳然而不言其自楚歸則未嘗予楚之專封也

冬十月葬蔡靈公公如晉至河乃復吳滅州來

十有四年春意如至自晉三月曹伯滕卒夏四月秋葬  
曹武公八月莒子去疾卒冬莒殺其公子意恢

十有五年春王正月吳子夷末卒二月癸酉有事于武  
宮籥入叔弓卒去樂卒事

叔弓涖事於廟籥入而卒去樂卒事禮也雖不涖事  
聞其喪猶去樂也故君有事於廟聞大夫之喪去樂  
卒事大夫聞君之喪攝主而往大夫聞大夫之喪尸

事畢而往皆不廢祭也

夏蔡朝吳出奔鄭六月丁巳朔日有食之秋晉荀吳帥師伐鮮虞冬公如晉

十有六年春齊侯伐徐楚子誘戎蠻子殺之

楚子虔誘蔡侯般殺之于申名而書地夷而害中國疾之也楚子誘戎蠻子殺之不名不地夷狄相殺畧之也戎蠻子之不名告畧也

夏公至自晉秋八月己亥晉侯夷卒九月大雩季孫意

如如晉冬十月葬晉昭公

十有七年春小邾子來朝夏六月甲戌朔日有食之秋  
邾子來朝八月晉荀吳帥師滅陸渾之戎冬有星孛于  
大辰楚人及吳戰于長岸

十有八年春王三月曹伯湏卒夏五月壬午宋衛陳鄭  
災六月邾人入郕秋葬曹平公冬許遷于白羽

十有九年春宋公伐邾夏五月戊辰許世子止弑其君  
買

許悼公瘡飲世子止之藥而卒其以弑書之何也止雖不志乎弑其君由止以卒則亦止弑之也君由止以卒而不以弑君書之則臣將輕其君子將輕其父亂之道也故止之弑君雖異乎楚商臣蔡般也而春秋一之所以隆君父也今律過失殺人以贖論過失殺君尊滅殺人二等過失殺大父母滅殺人一等而和御藥誤不如法者死父子之親許以情論至於君臣則情不勝法此蓋春秋之遺意也

己卯地震秋齊高發帥師伐莒冬葬許悼公

二十年春王正月夏曹公孫會自鄭出奔宋秋盜殺衛侯之兄縶

齊豹為衛司寇怨縶而殺之豹非小臣而書盜所謂求名而不得者也

冬十月宋華亥向寧華定出奔陳

宋元公無信多私而惡華向三大夫謀誘羣公子而殺之公如華氏請焉劫之而質其大子公怒攻之遂

出奔

十有一月辛卯蔡侯廬卒

二十有一年春王三月癸亥葬蔡平公夏晉侯使士鞅來聘  
宋華亥向寧華定自陳入于宋南里以叛

宋司馬華費遂之子貍及多僚相惡多僚譖貍于公  
公將逐之貍殺多僚劫費遂而召亡人入居于宋之  
南里召吳楚以自救書曰入于宋南里與宋分國而  
居之也

秋七月壬午朔日有食之八月乙亥叔輒卒冬蔡侯朱出奔楚

蔡侯朱立楚費無極取貨於平公之弟東國謂蔡人曰朱不用命君王將立東國不然楚必圍蔡蔡人懼而出朱朱奔楚自訴不克

公如晉至河乃復

二十有二年春齊侯伐莒宋華亥向寧華定自宋南里出奔楚大蒐於昌間夏四月乙丑天王崩六月叔鞅如



京師葬景王王室亂

叔鞅至自京師知王室之亂而未知亂之所在也故書曰王室亂稱王室亂在兄弟也諸侯之亂未有不待事而書者不待事而書亂急王室也

劉子單子以王猛居于皇

景王世子壽蚤卒其次猛也子朝王之長庶也景王欲立子朝不克而崩劉子單子奉子猛為王而子朝作亂故出居于皇以避之凡君未葬稱子某既葬稱

子景王既葬則猛稱王子可也不稱王子而稱王猛何也禮天子七月而葬景王以亂故三月而葬非禮也故與子以未葬之禮稱名雖然猛方與子朝爭子朝稱王子朝而猛稱王子猛皆王子則無以明正也特稱王猛所以明正也其言劉子單子以王猛居于皇猛幼制在劉單也

秋劉子單子以王猛入于王城

晉人助猛故得還入王城不言京師非王都也郊鄆

謂之王城成周謂之京師其言入子朝難之也

冬十月王子猛卒

猛既稱王猛矣於其卒也稱王子猛何也春秋書名嚴於卒葬於其卒不得不正其本名也所謂非薨非葬名有所不必盡也

十有二月癸酉朔日有食之

二十有三年春王正月叔孫婁如晉癸丑叔鞅卒晉人執我行人叔孫婁

邾人城翼師自武城還魯人譎而取之邾人訴于晉  
晉來討故叔孫婼如晉晉人執之稱行人言非其罪  
也

晉人圍郊夏六月蔡侯東國卒于楚秋七月莒子庚與  
來奔戊辰吳敗頓胡沈蔡陳許之師于雞父胡子髡沈  
子逞滅獲陳夏齧

吳伐州來楚遂越帥師及諸侯之師救之吳公子光  
先敗六國之師楚師遂奔春秋書諸侯之師未有畧

而不序者今畧而不序何也頓胡沈皆君也蔡陳許皆大夫也將言及其君與大夫戰則未陳也將言敗其君與其大夫則胡子沈子滅陳大夫獲不可止言敗也故畧言敗其師而詳其滅獲於後蓋亦記事之宜也且序其敗不以國之大小而以君大夫為先後則亦微見之矣

天王居于狄泉尹氏立王子朝

王猛敬王當立也故不言其立言子朝之立明其不

當立也且尹氏立之非周人之欲立則與衛晉異矣  
尹氏者天子之卿也或稱尹子或稱尹氏何也時以  
氏稱之也詩曰王謂尹氏則尹之稱氏也舊矣或曰  
稱氏譏世卿也然則大雅之美宣王蓋亦譏世卿歟  
八月乙未地震冬公如晉至河有疾乃復

二十有四年春王二月丙戌仲孫貜卒姒至自晉夏五  
月乙未朔日有食之秋八月大雩丁酉杞伯郁釐卒冬  
吳滅巢葬杞平公

二十有五年春叔孫婼如宋夏叔詣會晉趙鞅宋樂大  
心衛北宮喜鄭游吉曹人邾人滕人薛人小邾人于黃  
父有鸛鵒來巢秋七月上辛大雩季辛又雩九月己亥  
公孫于齊次于陽州齊侯唁公于野井冬十月戊辰叔  
孫婼卒十有一月己亥宋公佐卒于曲棘十有二月齊  
侯取鄆

二十有六年春王正月葬宋元公三月公至自齊居于  
鄆夏公圍成秋公會齊侯莒子邾子杞伯盟于鄆陵公

至自會居于鄆九月庚申楚子居卒冬十月天王入于成周尹氏召伯毛伯以王子朝奔楚

二十有七年春公如齊公至自齊居于鄆夏四月吳弑其君僚楚殺其大夫卻宛秋晉士鞅宋樂祁犁衛北宮喜曹人邾人滕人會于扈冬十月曹伯午卒邾快來奔公如齊公至自齊居于鄆

二十有八年春王三月葬曹悼公公如晉次于乾侯夏四月丙戌鄭伯寧卒六月葬鄭定公秋七月癸巳滕子



寧卒冬葬滕悼公

二十有九年春公至自乾侯居于鄆齊侯使高張來唁  
公公如晉次于乾侯夏四月庚子叔詣卒秋七月冬十  
月鄆潰

三十年春王正月公在乾侯

二十五年公出至此五年矣公雖在外而猶在魯因  
其出入而書之可也二十九年鄆潰公無所歸而寓  
于晉故於每年正月書曰公在乾侯所以存公也鄆

曰居乾侯曰在魯地公所得專晉地非所得專也

夏六月庚辰晉侯去疾卒秋八月葬晉頃公冬十有二  
月吳滅徐徐子章羽奔楚

三十有一年春王正月公在乾侯季孫意如會晉荀躒  
于適歷夏四月丁巳薛伯穀卒晉侯使荀躒唁公于乾  
侯秋葬薛獻公冬黑肱以濫來奔十有二月辛亥朔日  
有食之

三十有二年春王正月公在乾侯取闕夏吳伐越秋七

月冬仲孫何忌會晉韓不信齊高張宋仲幾衛世叔申  
鄭國參曹人莒人薛人杞人小邾人城成周十有二月  
己未公薨于乾侯

春秋集解卷十

欽定四庫全書

春秋集解卷十一

宋 蘇轍 撰

定公

元年春王三月晉人執宋仲幾于京師夏六月癸亥公之喪至自乾侯戊辰公即位秋七月癸巳葬我君昭公九月大雩立煬宮冬十月隕霜殺菽

僖三十三年書隕霜不殺草今指言殺菽何也於其不殺而言草言其廣也於其殺而言菽言其所害也

二年春王正月夏五月壬辰雉門及兩觀災秋楚人伐吳冬十月新作雉門及兩觀

三年春王正月公如晉至河乃復二月辛卯邾子穿卒夏四月秋葬邾莊公冬仲孫何忌及邾子盟于拔

四年春王二月癸巳陳侯吳卒三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏于召陵侵楚夏四月庚辰蔡公孫姓帥師滅沈以沈子嘉歸殺之五月公及諸

侯盟于臯鼫杞伯成卒于會六月葬陳惠公許遷于容  
城秋七月公至自會劉卷卒葬杞悼公楚人圍蔡晉士  
鞅衛孔圉帥師伐鮮虞

昭十二年楚滅陳蔡晉人不救而伐鮮虞稱晉以夷  
之今晉既不為蔡伐楚楚人圍蔡亦弗之救而於其  
伐鮮虞也稱晉士鞅衛孔圉何也晉雖有棄諸侯之  
罪而蔡無國滅之禍輕重之異也

葬劉文公冬十有一月庚午蔡侯以吳子及楚人戰于

柏舉楚師敗績楚囊瓦出奔鄭

楚平王殺伍奢其子員奔吳為吳行人囊瓦殺卻宛  
伯氏之族出伯州犂之孫嚭為吳太宰以謀楚故蔡  
侯因之以乞師囊瓦帥師禦之吳稱子而囊瓦稱人  
何也吳以夷故不得稱人又不可言以吳特稱吳子  
書實也囊瓦以貪致寇不能死而出奔稱人賤之也  
庚辰吳入郢

五年春王三月辛亥朔日有食之夏歸粟于蔡於越入



興六月丙申季孫意如卒秋七月壬子叔孫不敢卒冬  
晉士鞅帥師圍鮮虞

六年春王正月癸亥鄭游速帥師滅許以許男斯歸二  
月公侵鄭公至自侵鄭夏季孫斯仲孫何忌如晉秋晉  
人執宋行人樂祁犁冬城中城季孫斯仲孫忌帥師圍  
鄆

七年春王正月夏四月秋齊侯鄭伯盟于鹹齊人執衛  
行人北宮結以侵衛齊侯衛侯盟于沙大雩齊國夏帥

師伐我西鄙九月大雩冬十月

八年春王正月公侵齊公至自侵齊二月公侵齊三月  
公至自侵齊曹伯露卒夏齊國夏帥師伐我西鄙公會  
晉師于瓦公至自瓦秋七月戊辰陳侯柳卒晉士鞅帥  
師侵鄭遂侵衛葬曹靖公九月葬陳懷公季孫斯仲孫  
何忌帥師侵衛冬衛侯鄭伯盟于曲濮從祀先公

從順也先公閔僖也逆祀則稱躋僖公順祀則稱先  
公何也徧祀先公也於是陽虎欲去三桓故順祀而

析焉虎之謀去三桓亂也而其順祀則禮也春秋善惡不以相及各書其實而已

盜竊寶玉大弓

陽虎將殺季孫斯不勝而出取寶玉大弓寶玉大弓魯之分器也所謂夏后氏之璜與封父之繁弱是時陽虎以鄆讎龜陰叛奔齊十年侯犯以郕叛及昭十三年南蒯以費叛皆以賤不書其書竊寶玉大弓何也分器重於地分器重於地者賤貨而貴命也

九年春王正月夏四月戊申鄭伯蠆卒得寶玉大弓六月葬鄭獻公秋齊侯衛侯次于五氏

齊侯伐晉夷儀克之衛侯會之五氏言次而不言伐齊衛告次而不告伐也

秦伯卒冬葬秦哀公

十年春王三月及齊平夏公會齊侯于夾谷公至自夾谷晉趙鞅帥師圍衛齊人來歸鄆謹龜陰田叔孫州仇仲孫何忌帥師圍郕秋叔孫州仇仲孫何忌帥師圍郕

宋樂大心出奔曹

樂祁犂死於晉晉人止其喪以求成于宋宋使樂大  
心盟晉且逆祁犂之喪大心辭偽有疾祁犂之子溷  
譖而逐之

宋公子地出奔陳冬齊侯衛侯鄭游速會于安甫叔孫  
州仇如齊宋公之弟辰暨仲佗石彊出奔陳

十有一年春宋公之弟辰及仲佗石彊公子地自陳入  
于蕭以叛夏四月秋宋樂大心自曹入于蕭冬及鄭平

叔還如鄭洺盟

十有二年春薛伯定卒夏葬薛襄公叔孫州仇帥師墮  
郈衛公孟彊帥師伐曹季孫斯仲孫何忌帥師墮費秋  
大雩冬十月癸亥公會齊侯盟于黃十有一月丙寅朔  
日有食之公至自黃十有二月公圍成公至自圍成

仲由為季氏宰將墮三都於是叔孫氏墮郈季氏將  
墮費公山不狃叔孫輒帥費人以襲魯公與三子入  
于季氏之宮登武子之臺費人攻之入及公側仲尼

命申句須樂頤下伐之費人比二子奔齊遂墮費將墮成公斂處父不欲公圍之弗克不書三人之亂皆陪臣也或曰昭公將去季氏而失國孔子為魯而墮三都亦幾於亂孔子之為是何也曰昭公之去季氏而失國失民故也魯君之失民與三桓之得民久矣故將以治魯而不得三桓不可為也能得三桓而道之以禮樂猶可治也孔子為魯而仲由為季氏宰三家從之矣其不從者其家臣也家臣未能得魯衆也

雖其不從不能為患此孔子之所以墮三都而無疑也

十有三年春齊侯衛侯次于垂葭夏築蛇淵囿大蒐于比蒲衛公孟彊帥師伐曹秋晉趙鞅入于晉陽以叛冬晉荀寅士吉射入于朝歌以叛晉趙鞅歸于晉薛弑其君比

十有四年春衛公叔戌來奔衛趙陽出奔宋二月辛巳楚公子結陳公孫佗人帥師滅頓以頓子牂歸夏衛北



宮結來奔五月於越敗吳于檣李吳子光卒公會齊侯  
衛侯于牽公至自會秋齊侯宋公會于洮天王使石尚  
來歸脤

石尚天子之士也天子之士稱王人石尚之名以其  
接我特書也脤祭肉也禮助祭則受胙魯不助而歸  
之非禮也不然魯之助則微者也

衛世子蒯聵出奔宋衛公孟彊出奔鄭宋公之弟辰自  
蕭來奔大蒐于比蒲邾子來會公城莒父及霄

十有五年春王正月邾子來朝魍鼠食郊牛牛死改卜  
牛二月辛丑楚子滅胡以胡子豹歸夏五月辛亥邾壬  
申公薨于高寢鄭罕達帥師伐宋齊侯衛侯次于渠蔭  
邾子來奔喪秋七月壬申姒氏卒八月庚辰朔日有食  
之九月滕子來會葬丁巳葬我君定公雨不克葬戊午  
日下昃乃克葬辛巳葬定姒冬城漆

春秋集解卷十一

欽定四庫全書

春秋集解卷十二

宋 蘇轍 撰

哀公

元年春王正月公即位楚子陳侯隨侯許男圍蔡

定六年鄭滅許今復見者楚封之也

鼯鼠食郊牛改卜牛夏四月辛巳郊秋齊侯衛侯伐晉

冬仲孫何忌帥師伐邾

二年春王二月季孫斯叔孫州仇仲孫何忌帥師伐邾

取潯東田及沂西田癸巳叔孫州仇仲孫何忌及邾子盟于句繹

三子伐邾邾人賂以沂潯之田乃受盟再序大夫季孫不盟也

夏四月丙子衛侯元卒滕子來朝晉趙鞅帥師納衛世子蒯聵于戚

定十四年蒯聵將殺南子不克而出靈公卒衛人將立蒯聵之弟郢郢乃立蒯聵之子輒夫蒯聵得罪于

靈公而出則非世子矣其以世子書之何也以爲靈公之卒衛人嘗立郢郢立則蒯聵非世子雖拒之可也衛人廢蒯聵而立輒則蒯聵猶世子也何也蒯聵廢則輒不當立輒立則蒯聵不廢靈公廢之而衛人立其子以成之雖欲不以世子名之可乎然則以世子名之何爲而可曰不幸而立輒則輒當辭辭而不獲則致國乎蒯聵如是而後可子路問於孔子曰衛君待子而爲政子將奚先曰必也正名乎名不正則

言不順言不順則事不成事不成則禮樂不興禮樂不興則刑罰不中刑罰不中則民無所措手足故君子名之必可言也言之必可行也君子於其言無所苟而已矣若輒以世子之子立而拒世子蒯聵稱世子而不得立得為正名乎雖然世子不言納世子當立者也當立者無所事納矣稱世子而言納見其非世子而衛人以為世子耳

秋八月甲戌晉趙鞅帥師及鄭罕達帥師戰于鐵鄭師

敗績冬十月葬衛靈公十有一月蔡遷于州來蔡殺其

大夫公子駟

元年楚將遷蔡于江汝之間蔡於是請遷于吳書曰  
蔡遷于州來自遷也蔡請遷于吳既而悔之吳以師  
遷之故殺駟以說稱國以殺非其罪也

三年春齊國夏衛石曼姑帥師圍戚

曼姑為子圉父知其不義故推齊使為兵首從而書  
之罪之也

夏四月甲午地震五月辛卯桓宮僖宮災季孫斯叔孫州仇帥師城啓陽宋樂髡帥師伐曹秋七月丙子季孫斯卒蔡人放其大夫公孫獵于吳冬十月癸卯秦伯卒叔孫州仇仲孫何忌帥師圍邾

四年春王二月庚戌盜殺蔡侯申蔡公孫辰出奔吳葬秦惠公宋人執小邾子夏蔡殺其大夫公孫姓公孫霍當書蔡人殺其大夫不言人闕文也

晉人執戎蠻子赤歸于楚



楚人圍蠻氏蠻子赤奔晉楚人求之晉人執而予之  
晉主諸侯而為楚執其所滅罪之也僖二十八年晉  
侯入曹執曹伯畀宋人其不曰畀楚人而曰歸于楚  
何也曹非宋有而蠻子楚之所滅也

城西郭六月辛丑亳社災

亳社商社也周之滅商也以其社賜諸侯所謂亡國  
之社也亡國之社必屋故災也

秋八月甲寅滕子結卒冬十有二月葬蔡昭公葬滕頃

公

五年春城毗夏齊侯伐宋晉趙鞅帥師伐衛秋九月癸酉齊侯杵臼卒冬叔還如齊閏月葬齊景公

春秋不書閏月此其書閏月何也喪事不數閏譏其以閏月葬也

六年春城邾瑕晉趙鞅帥師伐鮮虞吳伐陳夏齊國夏及高張來奔

齊景公無適子諸子鬻如之子荼嬖公疾使國夏及

高張立荼寘羣公子於萊公卒陳乞將立陽生乃與諸大夫謀先逐國高

叔還會吳于祖秋七月庚寅楚子軫卒齊陽生入于齊陳乞召陽生于魯而匿之其家諸大夫莫之知且荼猶在也故書入不稱公子將為君

齊陳乞弑其君荼

陳乞立陽生而遷荼於賴陽生使朱毛殺荼書曰陳乞弑其君乞雖不弑而弑君之禍乞為之也

冬仲孫何忌帥師伐邾宋向巢帥師伐曹

七年春宋皇瑗帥師侵鄭晉魏曼多帥師侵衛夏公會  
吳于鄆秋公伐邾八月己酉入邾以邾子益來

魯入邾以邾子益來而不言滅何也邾大夫茅夷馮  
保於茅請救於吳明年吳為之伐魯魯復邾子故不  
言滅邾既滅矣幸而得復故邾雖無君而於出名之  
在外曰以歸在內曰以來內外之別也

宋人圍曹冬鄭駟弘帥師救曹

八年春王正月宋公入曹以曹伯陽歸

此滅曹也其不言滅何也曹伯陽好田弋曹之鄙人公孫彊獲白鴈而獻之且言田弋之說說之因訪政事大說之彊言霸說於曹伯曹伯從之乃背晉而奸宋宋人伐之晉人不救書曰宋公入曹而不書滅言自滅也猶虞之滅言晉人執虞公而不言滅也

吳伐我

不言西鄙而直言伐我兵加于國都也於是為城下

之盟而還不書諱之也

夏齊人取讎及闡

齊侯之在魯也季康子以其妹妻之即位而逆之季  
魴侯通焉女言其情弗敢與也齊侯怒故取讎及闡  
歸邾子益于邾

齊侯以季姬故請師於吳將以伐魯故懼而歸邾子  
秋七月冬十有二月癸亥杞伯過卒齊人歸讎及闡

魯歸季姬于齊故齊人歸二邑不言來歸歸邑而不

遣使也

九年春王二月癸巳僖公宋皇瑗帥師取鄭師于雍丘  
夏楚人伐陳秋宋公伐鄭冬十月

十年春王二月邾子益來奔

八年魯歸益于邾益為無道吳討而囚之使其大夫  
奉其太子革以為政故出

公會吳伐齊

會夷狄以伐中國惡莫甚焉

三月戊戌齊侯陽生卒

八年齊侯請師于吳將以伐魯既而季姬有寵乃辭  
吳師吳子怒反與公伐齊齊人殺其君以說而以疾  
赴春秋從而書之猶鄭髡頑也

夏宋人伐鄭晉趙鞅帥師侵齊五月公至自伐齊葬齊  
悼公衛公孟彊自齊歸于衛

彊蒯聵之黨也靈公既沒則彊之歸無難矣

薛伯夷卒秋葬薛惠公冬楚公子結帥師伐陳吳救陳



十有一年春齊國書帥師伐我夏陳轅頤出奔鄭

轅頤為司徒賦封田以嫁公女有餘以為已大器故國人逐之

五月公會吳伐齊甲戌齊國書帥師及吳戰于艾陵齊師敗績獲齊國書

戰不言公公會伐而不會戰也

秋七月辛酉滕子虞母卒冬十有一月葬滕隱公衛世子齊出奔宋

齊初娶于宋子朝其娣嬖子朝出孔文子使齊出其妻而妻之齊寘其初妻之娣於犁如二妻文子怒而奪其妻或淫於外州外州人奪之軒以獻耻是二者故出

十有二年春用田賦

丘賦之法因其田財通出馬一匹牛三頭令別其田及家財各為一賦故曰田賦譏重斂也

夏五月甲辰孟子卒

孟子昭公夫人吳女也不稱夫人姬氏諱娶同姓也不書葬不祔于廟也語曰公娶于吳為同姓謂之吳孟子然則孟子者魯人之所以號昭夫人也春秋因而書之耳

公會吳于橐臯秋公會衛侯宋皇瑗于鄆宋向巢帥師伐鄭冬十有二月螽

周之十二月夏之十月不當有螽蓋失閏也故季孫問於仲尼仲尼曰丘聞之火伏而後蟄者畢今火猶

西流司歷過也

十有三年春鄭罕達帥師取宋師于岳夏許男成卒公會晉侯及吳子于黃池

襄十年會于柰十四年會于向皆書曰魯會諸侯會吳于某以吳為會故也其餘非以吳為會則書吳與諸侯齒故戚之會吳以鄆故稱人黃池之會吳以晉侯故稱子不可言晉侯吳故也公羊曰吳稱子吳主會也穀梁曰進之也夫晉方主會而曰吳主會吳方

凌虐小國而曰進之可乎然則以晉侯及吳子何也  
春秋有以邑相及有以大夫相及皆非義也猶以晉  
侯及吳子也

楚公子申帥師伐陳於越入吳秋公至自會晉魏曼多  
帥師侵衛葬許元公九月螽冬十有一月有星孛于東  
方

旦而亭見故不得其次也

盜殺陳夏區夫

稱盜微者也

十有二月螽

十有四年春西狩獲麟

狩而不地為獲麟書略之也麟仁獸也出非其時孔子以自況也故春秋終焉然則春秋始於隱公而終於哀公何也自周之衰天下三變而春秋舉其中焉耳其始也雖幽厲失道王室昏亂而禮樂征伐猶出於天子諸侯畏周之威不敢肆也雖春秋將何施焉

及其中也平王東遷而周室不競諸侯自為政周道  
陵遲夷於列國迨隱之世習以成俗不可改矣然而  
文武成康之德猶在民未忘周也故齊桓晉文相繼  
而起莫不秉大義以尊周室會盟征伐以王命為首  
諸侯順之者存逆之者亡雖齊晉秦楚之強義之所  
在天下予之義之所去天下叛之世雖無王而其法  
猶在也故孔子作春秋推王法以繩不義知其猶可  
以此治也及其終也定哀以來齊晉既衰政出於大

夫繼之以吳越荆蠻之衆橫行於中國以勢力相吞  
滅禮義無所復施刑政無所復加雖欲舉王法以繩  
之而諸侯習於凶亂不可告語風俗靡然日入戰國  
是以春秋終焉由此觀之則春秋起於五伯之始而  
止於戰國之初隱哀適其時耳孔子曰禮樂征伐自  
諸侯出十世希不失矣自大夫出五世希不失矣自  
隱至昭而逐於季氏凡十世自宣至定而制於陽虎  
凡五世蓋自隱以來諸侯始專而五伯之形成獲麟



之歲齊田常弑簡公自是以專齊其後二十八年韓  
趙魏自是以分晉而戰國之形成左丘明傳春秋止  
於知伯之亡古之達者蓋知之歟孟子曰王者之迹  
熄而詩亡詩亡然後春秋作夫二雅終於幽王而春  
秋作於平王蓋與變風止於陳靈陳靈之後六十餘  
年而獲麟變風之所不刺則春秋之所不書也

春秋集解卷十二